

## **Kolosi**

### **Kolosi nin Yesuyen alya bereya hitte Pol belen asan kayyin**

<sup>1-2</sup> Ne Polbe kadinin Timotiya dufay un-kuren po kerdeb den Kolosi taunde nin Yesu Kristuyen alya bereya sios nin asan gago kan hime. Nebe Al Kurunyen dufayde Yesu Kristuyen mere basan al aposel himirin. Denbe Yesu Kristuya hen Al Kurun dilingde wukken hitin, irde bitinde mat fudinde wor po meremin gama irde han-yen.

Ningeb Adoninin Al Kurun belen bunin-en dirde igin igin dirde bitin yisikamke igin po hiwon yen nurde hime.

<sup>3-4</sup> Be, deyyabe den belen Yesu Kristu nin dufaytin sanin irde Al Kurunyen alya bereya goke aman-en nurde yunen han-yen gote mere momontin goyen nurde haryen. Ningeb den ge ten Doyan Al Kurunninin Yesu Kristu Nanin Al Kurun mere irde hen-yabe hugin-en igin nurde unen haryen.

<sup>5</sup> Den belen Yesu nin dufaytin taren irde kadin ge aman-en nurde yunen han-yen mata gobe Al Kurun belen kame igin igin diryen go yen dufay henbe gogo gwaha ten han-yen. Dufay gobe han-karya Yesu nin yitin mere igin fudinde goyen nuraminde mat forok yirin. Dufay gokeb den goyen Al Kurun belen kame igin igin yiren yen nurde ga hi.

<sup>6</sup> Mere igin goyen hanƙapya wor po den hitte kukeb Al Kurun belen buninen dirde igin igin dird dird mere goyen nurdeb fudinde yamin. Irdeb dufaytinya matatinyabe hoyan wor po hamin. Gwahade goyen po, megen kurun gayen mere igin gore iginen hen kurun hen kun hi.

<sup>7</sup> Denbe mere igin goyen meten kadninin wor po Epafras belen kun momon dirke nuramin. Yenbe binde mat fudinde wor po Yesu Kristu nin meten ten hiyen. Ningeb nen belen kun saba dirtinenbe yen belen nen faran dure yen gogo kun saba diryin.

<sup>8</sup> Irdeb mulgan hen wanbe den belen Holi Spirityen tarenge kadtin ge amanen nurde yunen hanzen goyen momon diryin.

*Kolosi nin mar nin Al Kurun gusunan irde hin-hin*

<sup>9</sup> Ningeb mere momontin nurarun goyenter mat den ge ten Al Kurun gusunan ird ird nin bada ma hen haryen. Gusunan irde henya be Holi Spirit belen yende dufay wukken kurun goya meremin bebak ten ten saninya goyen dunwon, irkeb Al Kurunyen dufay kenen kenkela wor po bebak tiwon yen gusunan irde haryen.

<sup>10</sup> Gogab matatin gobe Doyan Al Kurunyen alya bereya belen mata ten hanzen gwahade po ten hinayin, irde yen belen amanen nurde hitek mat po mata ten hinayin, irdeb meten igin po ten gote iginen kurun forok yirde hinayin. Irde Al Kurunbe al gwahade yen kenkela nurde yenna kadam nurd gunen ten ten gobe kurun hen taren hen hiyen.

<sup>11</sup> Irdeb kanduk kurayen kurayen kurun yeney hinayin gega, tareñmin kurun turnun yan goreb sanin dirkeb kanduk goke mukku ma ten goya goya sanin po hen hinayin. Irde Al Kurun belen kanduk goyen pasi irwon yen doyan hen hen ge pinen ma hen hinayin. Irdeb mata den hitte forok yen hinayin kurun goke amanen wor po nurde henya

<sup>12</sup> Nanninin igin nurd unen hinayin yen gusunan irde haryen. Adonininbe mata igin hulsire nin mar yen belen doyan yirde igin igin yirde hi gwahade goyen po, den manan igin igin dirtek mar diryin.

<sup>13</sup> Irdeb mata bulunyen kidoma bana mat dumulan ten Urmin bubulkuñne wor po yen nurde untin al gore doyan yirde hi gasun bana gon dawaryin.

<sup>14</sup> Urmin gore mata buluninin halde dunyin geb, nenbe kidoma bana ma hen igin po hite gago.

### *Yesu Kristuyen mataya metenya*

<sup>15</sup> Be, Yesu Kristube al belen kenenbe Al Kurun banare hi gobe al gwahade yen bebak titek. Yenbe det kurun gate min al.

<sup>16</sup> Yen belen gab Al Kurun belen inke det kurun gayen yiryn. Det naninde ninya megen ninya, det kawan ninya banare ninya yiryn. Banare ninbe Al Kurunyen miyon tareñmin karkuwan kurayen kurayen hende ninya bande ninya, al denem yanya denem monya goyen yiryn. Forok yamin kurun gobe yen belen yingen ge ten yiryn.

<sup>17</sup> Yenbe det kurun gayen forok ma yekeya hinhin. Irdeb det kurun gayen yirdeb gwahade

po hinayin yen yiryin gwahade po gasunenyan han.

<sup>18</sup> Yenbe alya bereyamin sios gote doyan al wor po geb, siosbe Yesuyen ulin pigin yara, irdeb yingenbe sios gote tonan. Yenbe al kamtinde mat huward huward mata goyen min uryin al geb, yenbe mata gote min al. Gogab det kurun gate doyan al kurun hewen yenbe gogo gwaha tiyyin.

<sup>19</sup> Al Kurunbe matamin, dufayminyabe tarenminya goyen tumnan Urmin unen unen nin amanen nurdeb unyin.

<sup>20</sup> Irde Al Kurunbe megen nin detya nan kinde nin detya kurun gayen yenya awalikde hen hen goke amanen nuryin. Ningeb gwaha ire yenbe Urmin ten kerke katen kuruse hende darim wok irde kamyin.

<sup>21</sup> Hakot denbe mata bulun ten hinhan geb, dufaytinbe gisaw wor po hen Al Kurun hitte ma hinhan, irde asogo irde hinhan.

<sup>22</sup> Gega Al Kurunbe denya awalikde hitek yenbe Urmin ten kerke katen al wor po hen kuruse hende kamyin. Gogab han ka gabe den kurun gayen dilinde wukken hen ultinde merem mon henbe gwaha mat kura merem yan dirtek mon hinayin yen gogo gwaha tiyyin.

<sup>23</sup> Ningeb gwahade hitek yenbe dufaytin Yesu nin sanin irdeb gwahade po hinayin. Dufaytin yen ge taren iramin goyen taren po tanarde hinayin. Irde Yesu nin yitin mere igin go nurde kame Al Kurun belen igin igin diryen go yen nurd nurd gobe go ma tubul tinayin. Mere igin gobe megen nin alya bereya kurun gayen momon

yirde tukutin hanj. Ne Pol wor mere igin tagalde tukun tukun meten al wor po himirin. Ningeb mere igin goyen den wor nuraminj.

*Kolosi sios Pol belen faran uryin*

<sup>24</sup> Be, nebe den ge ten ulne misin katen hime goke amanen nurde hime. Yesu Kristuyen alya bereya siosbe Yesu Kristu ulin pigin yara geb, sios belen kanduk yenen hi gobe Yesu Kristu yingen kanduk yenen hi yara. Ningeb kanduk kurun sios hitte forok yen han goyen ne hitte manan tumnan forok yen hinayin goke amanen nurde hime.

<sup>25</sup> Nebe Al Kurun belen den ge ten meremin tumnan tagalde tukun hayin ninyin. Ningeb goyen meten ten ten al himirin geb, gago meten ten hime.

<sup>26</sup> Bikkenbe Al Kurunyen mere gote minbe ulyande wor po banare hinhin. Ningeb megen nin al tumnan bebak ma ten hinhan. Gega gayenterbe alya bereyamin hitte kawan yikala yirkeb bebak ten han.

<sup>27</sup> Mel gobe Al Kurun belen meremin igin wor po turnun yan gote min banare hitin goyen yikala yirmeke bebak tinayin yen nurdeb al min hoyan Yuda mar mon bana nin mar goyen basina yiryin. Meremin banare hi gote minbe gahade: Yesu Kristube denya han geb, den wor Al Kurunyen sanin turnun yan bana hinayin.

<sup>28</sup> Goke tenbe Yesu Kristu nin al buda kurun gayen momon yirde tukun hityen. Irde daha wor al buda kurun gayen Yesu Kristuya henbe mun kura bulun minmon hinayin yen Al Kurunyen dufay wukken de al bebak yirde saba yirde hityen.

<sup>29</sup> Nebe metenj gayen gake ulne misinj tap urde kurut wor po yenj himyen. Gwaha tenj henjyabe ne hitte metenj tarenj po tenj hi al gote tarenjde metenj tenj himyen.

## 2

<sup>1</sup> Be, denj Kolosi ninj marya Laodisia ninj marya irde kenjkela ma nurd nunenj hanj marya goyen tumnanj faranj durd durd ninj kurut wor po yenj hime gayen denj tumnanj nurwonj yenj nurde hime.

<sup>2</sup> Denj ge tenj kurut yenj hime gabe kurut yenj hime gore faranj durke bitinde mat saninj henjbe kadtin ge amanenj nurde awalikde hinayinj yenjbe gago kurut yenj hime. Gogab Al Kurunyen dufay nurde bebak tenj tenj tarenjbe kurunj hiyyen. Irde gab Al Kurunyen mere gote minj bikkenj banare hinhin goyen minj nurnayinj. Al Kurunyen mere gote minj banare hinhin gobe Yesu Kristu.

<sup>3</sup> Yenj banabe Al Kurunyen dufay wukkenya mereminj bebak tenj tenj dufayya goyen bana yirtin hanj. Dufay wukkenya mereminj bebak tenj tenj dufayya gobe samunj tarenj wor po.

<sup>4</sup> Monjo al kura belenj wanj usi dirde Yesu Kristu ninj dufaytin saninj irtinde mat hoyanj dukunak geb, mere gago dirde hime. Gogab go mar gote mere hapek yanj goyen fudinde yenj ma nurnayinj.

<sup>5</sup> Nebe denja tumnanj gor ma hite goyenbe, dufaynerbe denja tumnanj gor hite. Irdeb henj henjtinbe kenjkela wor po hanj goke amanj henj hime. Irde Yesu Kristu ninj dufaytin tarenj irde hanj goyen mananj korgonj monj, tarenj irtin hanj goke mananj amanj wor po henj hime.

*Yesuya po henj mata tenj hitek*

<sup>6</sup> Ningeb Yesu Kristube Doyan Al Kurunjinin yenj nurd unaminj geb, huginenj yenja henjbe mata iginj po tenj hinayinj.

<sup>7</sup> Irdeb he filgininj kura megenj binde kurkun saninj hanyen go gwahade, irde ya kura tola tarenj hende irtinj go gwahade goyen po, Yesuya henj tarenj henj hinayinj. Irdeb saba dirteke yenj ge dufaytinj saninj iraminj gobe tarenj po tanarde hinayinj. Irdeb huginenj Al Kurun iginj wor po nurd unenj hinayinj.

<sup>8</sup> Be, al kura belenbe megen ninj saba momon dirde hikeb fudinde yenj nurde gama ma yirde hinayinj. Go mar gote sababe minj minjmonj wor po. Yenbe asem yagot tikulaya megen ninj sabaya go po gama yirde hanj. Yesu Kristuyen merebe gama ma irde hanj. Ningeb saba gobe Yesu Kristuyen monj.

<sup>9</sup> Yesu Kristube Al Kurunj gega, al wor po henj megen gar hinhin. Ningeb yenj po gab Al Kurunjen dufayya matayabe tarenjminja goyen makinj wor po hitinj hi.

<sup>10</sup> Denj wor Yesu Kristuya henj dufayminja mataminjyabe saninjminja goyen kurunj wor po dunke makinj hitinj hanj geb, saba hoyanj kura gama irtek ma hanj. Yenbe megen ninj doyanj mar banare ninja kawan ninja kurunj gote doyanj al wor po.

<sup>11</sup> Be, Yuda mar guba yenj hanyen gwahade yara, denj mananj Yesu Kristuya hikeb yenj belenj mata hoyanj mat guba yenj duntinj yara diryinj. Yenj belenj guba yenj duntinenjbe bitinde mata bulun

tenj tenj dufay goyen yad siŋa yiriyiŋ. Gobe al belen haninŋde guba yeŋ hanyen gwahade moŋ.

<sup>12</sup> Yesu belen guba yeŋ yeŋ mata duntinjenbe fe baptais tenj tenj mata dunyiŋ. Deŋ baptais tamiŋ gote miŋbe Yesu kamke mete tiyamiŋ gwahade po, deŋ wor fe bana kurkamiŋ gobe kamtiŋen tiyamiŋ. Goyenpoga Al Kurun belen Yesu kamtiŋde mat isan hiriŋ tareŋmiŋ goke dufaytiŋ tareŋ irkeb Al Kurun belen deŋ wor disan hitiŋ yara dirde al gergen diriŋ.

<sup>13</sup> Be, deŋbe Yuda mar moŋ al miŋ hoyan. Niŋgeb hakotbe Moseyen saba ma nurdeb mata bulun kurayen kurayen tenj heŋbe Al Kurun diliŋde kamtiŋ yara hinhan. Goyenbe Yesu Kristu isan hiriŋ gwahade goyen po, deŋ wor disan hitiŋ yara dirde al gergen diriŋ. Al Kurunbe gwaha mat neŋ kurun gate mata bulun halde dunyiŋ.

<sup>14</sup> Neŋbe mata bulun tenj hitekeb Moseyen saba gore merem yaŋ dirtek hinhet. Goyenpoga Al Kurunbe Yesu Kristu belen kuruse hende kamiŋ gwahade po, merem yaŋ dirtiŋ goyen wor kuruse hende kerde mayde pasi iryiŋ.

<sup>15</sup> Gwaha matbe Al Kurun belen megen niŋ doyaŋ mar banare niŋya kawan niŋya kurayen kurayen gote saŋiŋ goyen yad siŋa yiriyiŋ. Tareŋmiŋ yad siŋa yiriyiŋ goyen al belen keneŋ bebak tinaŋ yeŋbe gogo Yesu kuruse hende kamiŋ.

*Megen niŋ marte mata ma gama irnayeŋ*

<sup>16</sup> Niŋgeb al kura waŋ dula tenj tenj mataya Al Kurun niŋ dufay heŋ heŋ ge gabu ird ird nalu karkuwanya gagasi gergen forok yeke goke gabu



irde dula ten ten matayabe Sabat naluya goyen goke gwaha gwaha ten hinayin dinen tikeb kenen unan ten hinayin.

<sup>17</sup> Mata bikkek kurun gabe kame mata gergen forok yetek gote tunanen po hinhan. Irde Yesu Kristu wayyinde matbe mata gergen fudinde goyen forok yamin yenen hite gago.

<sup>18</sup> Be, al kurabe ne harhem harhem dufay minyan gega, dufay goyen bana kerdeb al denem minmonde mata yara ten hanyen. Irde al kurabe Al Kurunyen miyon dolon yird yird nin aman hen hanyen. Go mar gobe huginen mitereya yuwar-warteya det yenen henbe goke ug po tagalde hanyen. Irde megen nin dufay po gama irde han geb, yingen ge turun turun ten hanyen. Ningeb denbe kame matatin gote murungem igin yawartek gega goyen gore usi dirke son henak geb, taren hen hinayin.

<sup>19</sup> Go mar gobe Yesu Kristuya gabu hetek mon, hoyan hoyan wor po. Gega nenbe Yesu Kristu ulin pigin yara, munan yingenbe tonan yara geb, nenbe yen hitte mat basan henbe kurabe hanin, kurabe kahan gwahade ala henbe kadom faran gurd ten hite. Irde Al Kurun belen gwaha mat mat taren henayin yen nurde hi gwahade mat po sanin hen hite.

<sup>20</sup> Be, denbe Yesu Kristuya tumnan kamamin geb, megen nin saba gote yufukde ma han. Gega dahade geb saba bikkek goyen gama po irde han? Saba bikkekdebe,

<sup>21</sup> “Det gobe tanarde ma, irde det go goya nene ma, munan det gobe sisan urde ma,” yitin goyen

danin geb gama irde han?

<sup>22</sup> Saba bikkek gobe megen nin al belen po forok yirtin, irde megen nin det mugol netek goke yen yitin.

<sup>23</sup> Saba bikkek gama irde han mar gobe Al Kurun dolon ird ird mata goyen taren irtek yenbe yingen de dufaymin po gama irde taren irde hanen. Irde ne harhem harhem dufay minyan gega, dufay goyen bana kerdeb al denem minmonde mata yara ten hanen. Irde mata bulun ulninin de han gayen hubu hewon yen nurdeb ulin yusulak ten, bing kutna irde, ulin de mata kurayen kurayen ten hanen. Mata gwahade ten han mar go yenenminbe dufay wukken gama irde han yara. Goyenpoga go mar gobe mata bulun ten ten nin bin harkeb dufay bulun go epte ma hika titek han.

### 3

#### *Al Kurun dilinde wukken hen hen mata*

<sup>1</sup> Goyenpoga denbe Yesu Kristuya kamtin de mat huwaramin geb, bitin de mat wor po det Al Kurunyen gasun de han goke po nurde hinayin. Al Kurunyen gasun de gorbe Yesu Kristu belen Doyan Al Kurun henbe Al Kurunyen hani yase belen keperde hi.

<sup>2</sup> Nin geb det Al Kurunyen gasun de nin goke po dufay hen hinayin. Det megen nin ge ma dufay hen hinayin.

<sup>3</sup> Denbe Yesu Kristu nin dufaytin sanin iramin goya goyenbe yenya kuruse hende kamamin yara hamin. Irdeb kamtin de mat Al Kurun belen disan

heke huwarde al gergen hamiñ. Niñgeb Yesu Kristu Al Kurun hitte hi gwahade goyen po, den al gergen hitiñ mar wor Al Kurun hitte han.

<sup>4</sup> Niñgeb Al Kurunya hugiñen hen hen mata gote miñ al Yesu Kristu tarenmiñ turnuñ yañ goya megen gar forok yiyyenya goyenbe den wor tarenñiñ turnuñ yañ manañ forok yenayiñ.

<sup>5</sup> Niñgeb megen niñ mata buluñ uliñde han kurun gobe yisikamnañ ko. Mata buluñ gobe gahade: leplep mata, mata buluñ mormok dapña kukuwa belen titiñ yara ten ten mata, uliñde aman hetek mata ten ten dufay, mata buluñ ten ten dufayyabe det uguñ po yad yad niñ dufay hen hen mataya. Det uguñ po yad yad niñ dufay hen hen mata gobe ungura doloñ yird yird mataya tunande.

<sup>6</sup> Al Kurunyen beararbe mata gwahade ten han mar goke katyen.

<sup>7</sup> Den wor hakotbe mata buluñ gwahade goyen ten kuñ hinhan.

<sup>8</sup> Gega gayenterbe mata buluñ gahade gayen yubul po tinayiñ. Mata gobe gahade: bearar mata, kuñuruñ mata, al buluñ yird yird dufay, mere buluñ mat ten ten matayabe nanyañ ten ten mataya. Niñgeb denbe mata goyen tumñañ po yubul tinayiñ.

<sup>9-10</sup> Denbe mata bikkek bitiñ bana hanjen goyen yad siña yirdeb al gergen han geb, kadam usi gird ma ten hinayiñ. Al gergen hitiñ gobe Al Kurun belen yingen yara dirde gergen diriñ geb, gogo hugiñen gergen dirde hikeb Al Kurunbe al gwahade yen kenkela nurdeb yenya kadam nurd

gunen ten awalikde wor po hinayin.

<sup>11</sup> Al Kurunya awalikde hiniŋ yen nurde han marbe igin gwaha ten hinayin. Yesu Kristube Kurunniŋ wor po. Yenbe neŋ kurun gaya awalikde hite. Niŋgeb Grik mar ma Yuda mar, guba yitiŋ mar ma guba ma yitiŋ mar, saba karkuwan yawartiŋ mar ma gwahade ma yawartiŋ maryabe meten mar ma doyan marya kurun goyen banabe bipti miŋmon. Igin ala po Al Kurunya awalikde hinayin.

<sup>12</sup> Niŋgeb denbe Al Kurun belen bubulkunne wor po yen nurde dunen basiŋa dirde wukken wor po dirtiŋ han geb, matabe gahade ten hinayin: kadtiŋ ge buniŋen nurd yunen hinayin, irde igin igin yirde hinayin, dindiken ge turun turun ma ten hinayin, bekkende igin mat al mere yirde hinayin, irde kadtiŋ kura matamiŋ igin hewon yen doyan hen hen ge piŋen ma hen hinayin. Mata gahade gab ulitiŋ umŋa yade hor yirde kun hanŋen yara hugiŋen gwaha po ten hinayin.

<sup>13</sup> Al kadtiŋ kura belen bulun dirke goya goke bulunen ma nurnayin. Doyan Al Kurun belen mata bulunŋi halde dunyiŋ gwahade goyen po, ditiŋde mata bulun goyen wor halde yunen hinayin.

<sup>14</sup> Irdeb mata igin igin buda kurun go hendebe kadtiŋ ge amanen nurd yunen yunen matatiŋ yan hinayin. Gwaha ten hinayinbe den tumŋan goyen al miŋ unŋuren wor po hen awalikde po hinayin.

<sup>15</sup> Be, Yesu Kristube al biŋ yisikamde kamde al. Niŋgeb tubul tike yen belen bitiŋ yisikamkeb

awalikde hinayin. Denbe al min hoyan hoyan gega, awalikde hen Yesu yufukde al min unjukan hen hen goke ten basina diryin. Irdeb goke ten Al Kurun igin nurde unen hinayin.

<sup>16</sup> Irde Yesu Kristuyen merebe bitin bana gasun unke kenkela wor po kipiryen. Irdeb kenkela dufay hen Al Kurunyen mere kadam saba gird tenbe, “Gwaha mat hitek gab igin,” yen kadam momon gird ten hinayin. Irdeb bitinde mat Al Kurun igin nurd unenya Al Kurunyen asande nin tikiya Al Kurun turun ird ird tikiyabe Holi Spirit belen bitinde tikin yupul titin goyen tikin hen hinayin.

<sup>17</sup> Irdeb mere ten hinayin ma mata kura ten hinayin kurun gobe Doyan Al Kurun Yesu nurd untin mar belen titek mat po ten hinayin. Irdeb Yesu Kristu hitte mat sanin tenbe Al Kurun igin nurd unen hinayin.

<sup>18</sup> Be, den bere almetin yanbe almetin yagot yufukde po hinayin.\* Go ten hinayin gobe Doyan Al Kurun gama irde han mar belen mata titek goyen po ten hinayin.

<sup>19</sup> Den al berem yanbe bertin yago nin amanen nurd yunenbe mata yen bin misin nurtek mat ma yirde hinayin.

<sup>20</sup> Den dirinbe mamtinja nantinyat mere nurdeb gama irde hinayin. Doyan Al Kurunbe mata gwahade gokeb aman hen hien.

<sup>21</sup> Den dirin nanin yagobe dirintin yago bin ar yenan mat ma mata yirde hinayin. Monggo gwaha

---

\* **3:18:** Mere gabe albe hende berebe bande yen ma yitin. Albe Al Kurunyen mere saba yirke berembe nurde gama iryen yen goke yitin.

yirkeb kame kafura dufay kurun henbe keperd keperdmin igin ma henayin geb.

<sup>22</sup> Den al kurat yufukde hen meten ten han marbe megen nin doyan martinde mere nurde hinayin. Meten ten hinayin goyen doyan martin yago belen denen hikeya po gwaha titekeb turun dirnan yen nurdeya ma meten ten hinayin. Gwaha titnenbe Doyan Al Kurun palap irde yen ge meten ten hite yen nurdeya bitinde mat wor po doyan martin ge meten ten hinayin.

<sup>23</sup> Meten ten hinayin kurun gobe bitinde mat wor po Doyan Al Kurun nin meten ten hite yen nurdeya meten ten hinayin. Al nin meten ten hite yen ma nurde hinayin.

<sup>24</sup> Mata gwahade ten hinayinbe Doyan Al Kurun belen mata igin ten hinayin gote murungem dunen yirin goyen dunen. Ningeb meten ten hinayin kurun gobe Doyan Al Kuruntin Yesu Kristu nin meten ten unen hite yen nurde gab meten ten hinayin.

<sup>25</sup> Munan al kura mata igin ma ten hiyenbe gote wolminenbe murungem bulun tiyyen. Al Kurunbe al kura po igin inen, kurabe bulun inen ma yirde hiyen geb, bulun titekeb bulun diryen.

## 4

<sup>1</sup> Be, den doyan mar wor gwahade po meten martin goyen mata huwak mat po kenkela doyan yirde hinayin. Den wor Doyan Al Kuruntinbe Al Kurunyen gasunde hi gogo yen nurde han geb, gago dinen hime.

*Al Kurunya mere ten ten matatinbe taren po irnayin*

<sup>2</sup> Be, nalutin kurunbe Al Kurun mere ird ird nin nurde hinayin. Irdeb Al Kurun mere irde henya be dufaytin mali hiburnen ma hiyen. Irdeb bitinde mat amanen nurde unen turun irde hinayin.

<sup>3</sup> Be, Al Kurun mere irde henya be nen belen Yesu Kristu nin yitin mere banare hi goyen tagal-tek belnen kerd dunkeb al budam mere goyen nurnayin yen gusunan irde hinayin. Nebe mere go tagalde himeke goke nad koyare neran gago hime.

<sup>4</sup> Ningeb ne nin Al Kurun gusunan irde hinayin. Irkeb mere tagalen yen nurde hime gobe kama ma hen kenkela po tagalen.

<sup>5</sup> Be, Yesu Kristu nin ma nurde han mar hittebe dufay kenkela hen ga mata ten hinayin. Irdeb Yesu nin momon yirtek belen kura kenen goya kama ma hen momon yirde hinayin.

<sup>6</sup> Irdeb meretinbe huginen al belen nurdeb, “Fudinde, ne faran nure yenbe gago mere nirde hi,” yen nurtek mat mere ten hinayin. Irdeb al belen gusunan kura dirkeb gwaha mat wol hetekbe igin nurnayin mat po wol hen hinayin.

*Mere funan*

<sup>7</sup> Be, Tikikus belen gab ne dahade hime goyen momon diryen. Yenbe kolne wor po yara, irde binde mat fudinde wor po Doyan Al Kurun nin meten ten hiyen. Yenbe meten kadne igin wor po.

<sup>8</sup> Yen belen gabe nen dahade hite goyen momon dirke go nurdeb aman hen taren henayin yen gago hulyan irhem.

<sup>9</sup> Yenbe Onesimusya kuriryen. Onesimus wor binde mat fudinde wor po Doyan Al Kurun nin meten ten hiyen. Yenbe kolninin wor po yara. Yenbe al hoyande nin mon, dende al po. Irem garebe nen hitere gar mata forok yen han kurun gayen tumnan momon diriryen.

<sup>10</sup> Be, kadne kura neya koyare har al Aristakus belen den ge dufay hen hi gayen momon yirayin ninkeb gago dinen hime. Banabas nomin Mak wor gwahade po den ge dufay hen hi. Yen ge momon dirmirin gogo geb, yen kun forok yeke kenenbe gargar irde kenkela doyan irde hinayin.

<sup>11</sup> Be, Yesus denem kurabe Yastus manan den ge dufay hen hi. Meten faran nurde han mar bana gonbe al karwo ga po ga Yuda mar. Mel gobe neya hen Al Kurun belen alya bereyamin doyan yird yird gote meten ten kun hityen. Irde kurare kanduknen nurde himekeb bene yurum irde hanjen.

<sup>12</sup> Be, dende al kura Yesu Kristuyen meten al Epafra goyen wor den ge dufay hen hi goyen momon yirayin ninke gago momon dirde hime. Al gobe dende al. Yenbe den goyen Al Kurunyen dufay tumnan yenen bebak ten sanin po huwardeb Yesuyen mere gama ird ird ninbe al parguwak yara hen yen ge hekken wor po nurde hiwon yen huginen taren po Al Kurun gusunan irde hiyen.

<sup>13</sup> Yenbe den ge po mon, Laodisia taundeya



Hierapolis taundeya niŋ Yesuyen alya bereya goke wor tareŋ wor po Al Kurun gusunan irde hiyen gobe fudinde yen dinen hime.

<sup>14</sup> Kadninin wor po yen ge amanen wor po nurde hityen al guram al Lukyabe Demasya manan den ge dufay hen har goke momon yirayin ninkeb gago dinen hime.

<sup>15</sup> Laodisia taunde niŋ Yesuyen alya bereya goya bere kura Nimfayabe yaminde gabu irde Al Kurun dolon irde hanjen marya goyen manan ne niŋ yen, “Yen belen den ge dufay hen hi,” yinnayin.

<sup>16</sup> Be, asan gayen den wa kapyan henbe Laodisia taunde niŋ Yesuyen alya bereya sios wor kapyan henayin yen ten kerke gor kuyen. Irdeb asan kura yen ge kamin goyen wor kamebe den belen wor ten kapyan henayin.

<sup>17</sup> Irdeb Akipus goyen, “Doyan Al Kurun belen meten guntin gobe kenkela tanarde meten ten hayin,” innayin.

<sup>18</sup> Ne Pol belen hanner wor po gahade kan hime: “Den ge dufay hen hime.”

Be, ne koyare hime gake bitin sir ma yiyyen. Denbe Al Kurun belen buninen dirde igin igin dirwon yen nurde hime. Gogo po.

**Al Kurunyen Mere Igin  
The New Testament in the Gwahatike Language of  
Papua New Guinea  
Nupela Testamen long tok ples Gwahatike long  
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

---

PDF generated using Haiola and XeLaTeX on 18 Mar 2025 from source files dated 31 Aug 2023

dbba218f-41f3-5f08-b0b6-2a7c919093ab